



UPA 2015/33

Tillie Martinussen

23. april 2015

Naalagaaffiit Peqatigiit meeqqat pillugit isumaqatigiissutaata ilanngunneqarnissaa pillugu kingusinnerpaamik 2016-imi ukiakkut ataatsimiinnermi Inatsisartut inatsisaattut siunnersuuteqaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Aaja Chemnitz Larsen, Inuit Ataqatigiit)

(Siullermeenera)

Demokraatini nunatsinni meeqqat pisinnaatitaaffiisa sulissutigineqarnerat siuttuuffigiuarsimavarput. Assersuutigalugu ukiorpassuarni partiini kisiartaalluta meeqqat ombudsmandeqalernissaat anguniarsimavarput. Qujanartumillu naggataatigut angullugu.

Taamatulli oqareerluta, qularutiginnngilluinnarpara partiit tamarluinnarmik, inimi maani inatsisartunut ilaasortat tamarluinnarmik isumaqatigiissutigigaat, meeqqat atugaat meeqqallu pisinnaatitaaffii pingaarluinnaqqeqqissaartut. Assortuussugiuassuarpulli qanoq iliorluta meeqqat pisinnaatitaaffii qularnaarsinnaanerigut.

Manna siunnersuut aqutigalugu Inuit Ataqatigiit aallartikkusuppaat pisariusorsuarmik inatsisiliortitsinissaq, Naalagaaffiit Peqatigiit meeqqat pillugit isumaqatigiissutaat Inatsisartut inatsisaannut ilannguttussanngorlugu.

Tamatumunnga atatillugu Demokraatini apequtit arlallit akissutissarserusuppagut:

1. Naalagaaffiit Peqatigiit meeqqat pillugit komitéanit pinngitsoorani piumasaqaataava, Naalagaaffiit Peqatigiit meeqqat pillugit isumaqatigiissutaat Kalaallit Nunaata inatsisaannut ilanngunneqassasoq?



2. Islandip, Norgip Finlandillu saniatigut nunat qassit Naalagaaffiit Peqatigiit meeqqat pillugit isumaqatigiissutaat inatsisiminnut ilanngunnikuuat?

3. Meeqqat ataasiakkaat qanoq ilillutik malugisinnaassavaat, Naalagaaffiit Peqatigiit meeqqat pillugit isumaqatigiissutaat nunap inatsisaanut ilanngunneqarsimasoq?

Apeqqutit qulaani taasagut qularnanngitsumillu aamma allat akineqaqqaartariaqarput siunnersuutip aappassaaneerpeqannginnerani.

Tamatuma saniatigut Demokratini maluginiarparput, Naalakkersuisut allannguutissamik siunnersuuteqarsimasut. Allannguutissatut siunnersuut taanna tutsuviginarnerusutut isigaarput, taamaattummillu tapersersornerorusullugu, oqallinnermi saqqummiunneqartut ataatsimiititaliallu suliaata allamik isumataartilinngippagut.

Siunnersuut Ilaqutariinnermut Peqqissutsimullu Ataatsimiititaliamut suliareqqitassanngorlugu innersuupparput.